

Thursday, February 13, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

LC/VC ELECTION

Mizoram chhunga Local Council leh Village Council inthlan result buatsaih mek a ni a, State Election Commission tarlan danin Local Council-ah leh Village Council pumpuiah rorel lai ZPM party in hneh takin hma an hruai mek.

State Election Commission atanga thudawn hnuhnung berin a tarlan danin Local Council pahnih - Aizawl Municipal Corporation leh Lunglei Municipal Council-a seat hmuh dan belhkhawm hi ZPM in seat 362, MNF in seat 195, Congress in seat 148 leh Independent in seat 11 te a ni mek a. Village Council-ah chuan ZPM in seat 1146, MNF in seat 740, Congress in seat 400, BJP in seat 12 HPC in seat 3 leh Independent in seat 88 an la mek a ni.

State Election Commission tarlan danin Aizawl Municipal Corporation hnuaiah voter zaa 63.87 in vote thlakin, Lunglei Municipal Corporation hnuaiah voter zaa 70.17 in vote an thlak a, Local Council pahniha vote tlak dan hi za zelah 64.79 a ni. Mizoram pumpuiah Village Council zawng zawngah voter zaa 75.43 in vote an thlak a, Lunglei district-ah vote tla tha berin voter zaa 80.93 in vote an thlak a ni.

State Election Commission hotute chuan tlai lam dar 3 bawr velah Local Council leh Village Council inthlan result kimchang a awm theih an beisei thu Akashvani an hrih a ni.



WORLD RADIO DAY

Akashvani Aizawl Director leh Cluster Head Pu DR Lalropuia chuan wawiin Radio Ni, World Radio Day chu mipuiten radio pawimawhzia an hriat tharna ni a nih a beisei thu sawiin, Akashvani Mizoram station programme hrang hrang leh chanchinthar te ngaihlu deuh deuh turin mipuite a sawm

Health Awareness Campaign & Gift a Radio Campaign puala hun hmanah hian Akashvani Aizawl Asst Director (Program) Pu Samuel Z. Hrangte, chuan thu sawiin tunlaiah social media hmanga awlsam taka thil hriat theih nimahse radio chuan ngaihhlut a la hlawh reng a ni ti a. Radio chuan program hrang hrang mipuite tana tangkai tur an buatsaih thin tih sawiin mipuite ngaihthla chhonzawm zel turin a duh tih a sawi a. Vawina Reiek Community Hall-a an buatsaih Health Awareness leh Gift a Radio Campaign

chu Broadcast Infrastructure Development Scheme hnuaia program siam tura an rawn tih angin Akashvani Aizawl chuan thil chi hrang hrang an buatsaih tih a sawi a ni.

Vawiina Radio puala hun hmanah hian Radio Programme hrang hrang ngaithla thate hena Radio pek an ni a he hunah hian, National Tobacco Control Program (NTCP) atanga Nodal Officer pahnih Dr H. Lianthangpuia leh R. Lalremruata ten taksa vawn hrisel nana mipuite tihtur zirtirna an pe a, Reiek khawtlang hruaitute leh Reiek High School bakah Reiek Middle School naupangte he hunah hian an tel a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar hi puan leh a ni ang.



INTERNATIONAL CONDOM DAY OBSERVED AT AIZAWL

Mizoram State Aids Control Society (MSACS), AIDS Healthcare Foundation India Cares leh Samaritan Society of Mizoram-te hmalaknain vawiin khan Aizawl-A Millenium Centre chung zawlah International Condom Day 2025 hman a ni.

He hun hi Mizoram State Aids Control Society Project Director Dr. Jane Rinsangi Ralte chuan hawngin hemi atana beihpui thlakna Generation C Campaign-in a tum ber chu thalaite zinga mipat hmeichhiatna atanga natna inkaichhawn theih hrang hrang leh HIV darh zel tur venhimna a nih thu leh condom hman tangkaina leh pawimawhzia zirtirna mai nilo in, nupui/pasal nei hmaa mipat hmeichhiatna hman loh zirtirna uar taka kalpui a nih thu te, HIV leh mipat hmeichhiatna hman atanga natna inkaichhawn theih hrang hrang laka mi tinte an fihlim nan Condom hman ziah pawimawhna leh tulna kalpui a ni dawn bawk tur thu a sawi a.

Hemi kawng beihpui thlakna Love Brigade Campaign hi kum 2020 atanga kalpui tawh niin, tun tum a thawhhnihna ah hian Two Wheelers Taxi Association te nen tangkawpin Two Wheelers Taxi Driver engemawzat hnenah Condom jacket sem a ni a. Heng bakah hian Love Brigade Campaign thawh hnihna ah hian Aizawl a Auto Drivers Association te hnenah HIV chungchang zirtirna hmanruaw dahna tur seat cover sem a ni dawn bawk a ni.

International Condom Day hi kum 2009 atang khan February ni 13 ah hman thin a ni.

